

東

澗

集

車

馬

車

東澗集

四庫全書珍本初集

集部
別集類

欽定四庫全書

集部四

提要

東澗集十四卷

別集類三

宋

臣等謹案東澗集十四卷宋許應龍撰應龍字恭甫閩縣人嘉定元年進士第調汀州教授累遷國子司業祭酒權直舍人學士二院官至端明殿學士簽書樞密院事提舉洞霄宮事蹟具宋史本傳其集則不見于藝文志

原書卷目已不可考明錢溥編次秘閣書目已不載其名則明初已散佚矣惟永樂大典頗散見其詩文抄撮排綴各體尚為粗備而制誥一類尤為繁富蓋應龍在理宗時歷掌內外制嘗以日昃拜命夜半宣鎖不二鼓而草三麻人服其敏史稱鄭清之喬行簡罷相制皆應龍所草帝極稱其善今二制並在此集中典雅嚴重實能得代言之體其他亦多深

厚簡切而于當時宰執將帥侍從諸臣姓名
官爵遷轉拜罷紀傳所未詳者尤可藉以徵
信于考史尤為有裨又應龍于經濟幹畧深
所究心其知潮州屬劇盜逼境隨機扞禦諸
寇悉平治潮政績與李宗勉治台齊名及為
兵部尚書值喬行簡行科提楮幣之法民間
不便應龍奏罷之今其劄子亦具存集內大
抵疏通暢達切中事情務為有用之言非篆

刻為文者可比雖其格力稍弱然春容和雅
中尚不失先正典刑在南宋館閣之中亦可
稱一作手矣謹以類裒次彙為十有四卷著
之于錄俾不致泯沒于後焉乾隆四十六年
九月恭校上

總纂官

臣紀昀臣陸錫熊臣孫士毅

總校官

臣陸費墀

膳錄貢生臣王穀

欽定四庫全書

東澗集卷一

宋 許應龍 撰

詔

科舉詔



改元以順天道將圖至治之教得賢而立邦基茲實急
先之務矧是歲適逢於大比而羣才方喜於彙征爰舉
異章肆頒換號書其德行道藝將以賓興取之族黨比
間式昭公道冀因名而得實蓋崇雅以黜浮俾偕計吏

而來以待所庭之間藹藹吉士必多忠言鯁論之流巍巍成功庶及嘉祐淳熙之盛故茲詔示想宜知悉

嘉平朔日蝕星聚避朝損膳廣宥多辟降詔

時懋厥德斯全裁成輔相之宜謫見于天當謹寅畏嚴恭之念朕自慙涼菲適值艱虞外焉疆場之未寧內則政事之多闕日蝕星聚既垂儆戒之機夕慮朝思期盡感通之實避殿減膳正事飭躬謂有過在予一人尚賴交修之益而推恩足保四海盍頒肆赦之書庶幾和氣

之致祥自格乾文之順軌與爾有衆永孚于休其令有
司檢會故實條具以聞

賜簽書樞密院事兼權參知政事李鳴復生日
詔

榮司樞筦參預政機茲當來復之初適屆誕彌之節宜
頒異數以介壽祺

賜參知政事李鳴復生日詔

月屆仲冬實陽氣潛萌之始天生賢佐乃太平能立之

基既昭弧矢之祥宜厚牽醪之禮往祇恩遇益介壽祺
賜端明殿學士朝請大夫同簽書樞密院事李
宗勉生日詔

金風送爽玉露團清允謂佳辰實生賢佐爰錫牽醪之
禮庸昭弧矢之祥往服榮恩益綏壽祉

賜特進左丞相兼樞密使肅國公喬行簡生日
詔

季秋改朔灝氣澄空茲宇宙之佳辰生廟堂之賢佐肆

頒慶賚式侑燕私往祇恩數之隆益介壽祺之永

賜太傅奉國軍節度使充萬壽觀使新安郡王

楊谷生日詔

望重懿親位尊公傅茲屆誕彌之旦茂膺滋至之休爰
錫多儀以昭隆眷

賜參知政事鄭性之生日詔

新陽來復愛日迎長實惟良辰是生賢佐宜頒寵數以
示眷私

皇叔保康軍承宣使希遷辭免特授保康軍節
度使提舉萬壽觀依前皇叔進封會稽郡開國
公加食邑食實封恩命不允詔

立愛惟親當由近始以德詔爵庶穆師言矧卿以叔父
之尊藹宗英之譽待人接物盎然如愛日之溫省事清
心澹乎若深淵之靚久任承流之職可無進律之褒遂
渙號于明廷俾建旌于舊鎮仍開公社庸侈徽章示隆
禮以尊賢初非私予胡辭榮而避寵母乃過謙其體至

懷亟祗成命

皇弟保康軍承宣使貴謙辭免特授保康軍節
度使仍奉朝請依前皇弟進封天水郡開國公
加食邑食實封恩命不允詔

朕繼志述事每思祖武之繩立愛惟親當篤天倫之眷
矧吾介弟夙迪令猷方隆友睦之情可後褒崇之典擢
從留務晉陟齋壇爰陞公爵之封并行圭鬲之食由序
而進非朕爾私顧出令以惟行豈循牆之可避亟祗成

渙母勞固辭所辭宜不允

皇弟武康軍承宣使提舉佑神觀與芮辭免特
授武康軍節度使提舉萬壽觀進封天水郡開
國子加食邑食實封恩命不允詔

朕立愛始于家實聖經之明訓于弟欲其貴乃大義之
當然矧有彝章難稽成渙是用分洋川而作鎮肇建節
旄即天水以進封併加并邑增棣華之韡韡延瓜瓞之
綿綿既允穆于師言宜亟欽于明命所辭宜不允

少師保寧軍節度使判大宗正事嗣秀王師彌
乞解職畀祠不允詔

卿屬近行尊量宏識遠久任訓齊之寄備著公勤陶成
信厚之風悉遵禮法善於其職簡在朕心胡存抗于囊
封乃力求于祠廩徒得君重以為公族之表儀僉曰汝
諧奚必謙詞而退避祇若予命毋煩重陳

特進鄭清之三辭免觀文殿大學士醴泉觀使
兼侍讀恩命不允不得更有陳請詔